

## Vreemde Vuur

### Lev.10: 1- 11

### Lees!!

**Lev 10:1** “En die seuns van Aäron, Nadab en Abihu, het elkeen sy vuurpan geneem en vuur daarin gegooi en reukwerk daarop gesit en **vreemde vuur voor die aangesig van die HERE gebring**, wat Hy hulle **nie beveel het nie**.

:2 Daarop het daar **vuur van die aangesig van die HERE uitgegaan** en hulle verteer, en hulle het **gesterwe** voor die aangesig van die HERE.”

Dit is interessant om daarop te let dat die **Heilige** en **onheilige** hier **saam gevind** word. Dit gebeur dikwels dat die mens **een oomblik in geestelike vervoering raak**, net om die volgende oomblik terug te val in sy **alledaagse lewe**.

Onverwags word die **mens aangegryp** tot die **neiging na sonde**, om in sy **verduistere toestand troubreek en egbreek** teenoor God te pleeg.

Dit was dan ook wat **Moses** aangetref het Nadat hy van die **berg Sinaï** afgeklim het. Die volk wat soveel **rede tot dankbaarheid** gehad het teenoor God,

die volk wat sovele male getuie gedra het van God se wonderwerke en **Almag** en **Krag**, was besig om vir hulle ‘n **goue kalf te maak** om te **aanbid**, en te **vereer** en te **dien**.

Hierdie selfde **aangryping tot die sonde** vind ons by Aäron se **twee seuns**. Net kort tevore het God die offers van Aäron met **welgevalle aangeneem**, en hier is sy twee oudste seuns besig om teen die wil van God te sondig.

En moet God **Sy gerig met vuur oor hulle voltrek**.

Die rede waarom hulle so **wreed gestraf** is, is omdat hulle **vreemde vuur** voor die aangesig van God gebring het.

Hulle was van die heel eerste Priesters wat God aangestel het en tog was hulle **onwaardig bevind** om God se werk waar te neem.

\*\*\*\*\*

In die voorhof van die Tabernakel was daar **twee soorte vuur**:

Daar was gewone vuur waarop die **vleis** van die **offerdiere gekook** is, en daar was vuur wat uit die hemel neergedaal het en wat bestem was vir die **offers** en die **reukwerk**.

Vir die besondere doel van die **offers** en die **reukwerk** mag alleenlik net die vuur wat God uit die **hemel gestuur het** gebruik word. Nadab en Abihu het waarskynlik nie gedink dit is **belangrik** van **watter vuur** hulle gebruik nie.

Solank hulle maar net die **vuurwerk kon brand**, was dit nie vir hulle **belangrik watter vuur** hulle gebruik nie. Hulle het gereken vuur is vuur. Wat maak dit nou saak vanwaar dit kom. Hulle wou net die **werk afgehandel** kry.

Deur die **groot eer** wat hulle te beurt geval het om as Priesters aangestel en geheilig te word het hulle **roekeloos** en **vermetel** geword. Soos baie van ons ook maar word wanneer ons in 'n **senior posisie** aangestel word.

Ons klim op 'n troontjie en ons begin om almal om ons te **hiet en gebied**.  
Ons ontwikkel so: **Ek is baas** en **ky is klaas** houding.

Sonder dat hulle die **opdrag** gekry het, en sonder **verlof van Moses** wat die diens gereël het, het elkeen van hulle hul reukpan geneem om 'n **reukoffer** te brand. Dit was baie verwaand van hulle.

Hulle het self die **allerheiligste genader** met die **doel** om daar **in te gaan**. Hulle het op hulle **eie goeddunke gehandel** en **nie gedoen** wat God hulle **beveel** het nie.

Hulle het 'n **eiewillige Godsdienst** gehad, hulle wou God dien volgens hulle **eie keuse**.

Hoewel dalk met 'n goeie bedoeling het hulle hul **ampsbevoegdheid te buite gegaan**. Hulle het die **grense** wat daar deur **die wet** aan hulle **gestel was** oorskry.

Hulle het hulle **vergryp teen die insettinge** van God. Dit was 'n vergryp teen die hoogheid, Majesteit en Heiligheid van God.

Die feit dat hierdie 'n **ernstige oortreding** was blyk uit die straf wat hulle vir hul **onbesonne daad ontvang**.

Nog voordat hulle die **Allerheiligste kon binnegaan** is hulle **verteer** deur 'n **vuur** wat van **God uitgegaan** het. Nog voordat hulle hul plan ten uitvoer kon bring was hulle nie meer daar nie. God het hulle **voor Sy aangesig weggevee**.

Nog voordat hulle daardie **besondere voorreg kon smaak**, was dit hulle **alreeds ontnem**. God laat nie met Hom **speel** nie.

Hulle het hulle Heilige werk **onverskillig gedoen**, hulle Heilige werk het hulle **onverskillig hanteer**. Hulle werk vir die Here het hulle sonder die nodige **agting** en **respek** gedoen.

Hulle het nie die nodige **eerbied** betoon nie. Hulle het nie die nodige **erns** aan die dag gelê nie. Ons moet besef, dat **alles wat God aangaan** 'n **absolute ernstige saak** is.

Daar is niks omtrent **God** of Sy **Woord** of Sy **huis** of Sy **diens** wat ons ligtelik kan opneem nie. Ons kan nie met God **grappies maak** nie, ons kan ook nie van God **grappies maak** nie.

Daar is letterlik **miljoene ander dinge** in hierdie lewe waarmee en waarvan die mens **grappies** kan maak, maar die Here moet ons **nie terg nie**. God se saak is 'n **ernstige saak**. God is nie **ons gelyke** nie.

Hy is **baie ver verhewe bo ons** of enige ander wese.

**Lev. 9:22** “Daarna het Aäron sy hande na die volk toe opgehef en hulle geseën. En hy het afgeklim nadat hy die **sondoffer** en **brandoffer** en **dankoffer** gebring het.

**:23** Daarop het Moses en Aäron in die tent van samekoms gegaan; en toe hulle uitkom, het hulle die volk geseën. **En die heerlijkheid van die HERE het aan die hele volk verskyn**

**:24** **vuur het van die aangesig van die HERE uitgegaan en op die altaar die brandoffer en die stukke vet verteer**. Toe die hele volk dit sien, het **hulle gejuig** en op hulle **aangesig** geval.”

Nadat die Here hierdie offers van Moses en Aäron met **vuur aangeneem** het, het die seuns natuurlik gedink hulle kan **doen wat hulle wil** en God sal ook hulle offer aanneem.

Hulle was te veel bewus van hulle **eie waardigheid** en **vernaamheid**. Hulle was immers aangestel as **Priesters van God**. Hulle het 'n **baie vername** posisie bekleed.

Wat hierdie hele saak nog erger maak is die feit dat hierdie twee seuns van Aäron ook nog onder die **invloed van alkohol** gewees het toe hulle hierdie **misdryf begaan** het.

Daarom sê die Here dan ook net direk na afloop van hierdie gebeure vir Aäron:

**Lev. 10:8** “En die HERE het met Aäron gespreek en gesê:

**Lev 10:9** Moenie wyn of sterk drank drink nie, jy of jou seuns saam met jou as julle in die tent van samekoms ingaan, dat julle nie sterwe nie; 'n ewige insetting is dit vir julle geslagte;

:10 en julle moet onderskeid maak tussen wat heilig en wat onheilig, en tussen wat onrein en wat rein is;"

Hierdie geld vir ons ook vandag, ons moet onderskeid maak tussen dit wat rein is en dit wat onrein is. Ons moet nie die Heilige dinge van God ontheilig nie.

Wanneer ons wyn drink vergeet ons wat God se wil is en wat God se orde is en wat God vir die mens bepaal het. Wyn maak jou baie groot en baie dapper en baie slim,

Hoe vreeslik moet dit nie wees om bedwelmend deur drank die ewigheid in te gaan nie, om beneweld deur drank deur God se oordele getref te word nie. Hoe vreeslik moet dit nie wees om in 'n beskonke toestand die verskrikking van die dood te smaak nie.

Hoeveel male in die lewe is ons nie dalk besig om verkeerde vuur voor God se aangesig te bring nie. Te veel keer doen ons dinge sonder om te vra: "Wat is God se wil"

Ons vra nie : "Wat het God gebied of wat verlang God nie." Ons doen net volgens ons eie begeerlikheid en ons eie mening. Ons is mos groot en kan vir onself besluit, ons kan ons eie keuses maak.

Ons besluit ook self hoe ons God wil dien. Ons besluit hoe ons wil kerkhou. Ons besluit hoe die diensorde moet verloop. Ons doen soos ons dit goedvind.

Ons dink, as daar maar reuwerk gebring word, as daar maar gesing en gebid en gepreek word, dan is alles in orde. Volgens ons eie denke is dit die hoofsaak, die wyse waarop alles gedoen word is vir ons van minder belang, solank ons dit net doen.

En dan vra ons: "Waarom woon God nie meer onder die lofsange van Sy volk nie." Maar ons bring sulke halwe offers, ons bring leë offers, ons bring verkeerde vuur voor die aangesig van God."

Ons matig onself die reg om God te dien soos ons wil, en nooit vra ons: "Here wat wil U hê nie? Here hoe verkies U dit?" Ons Glo ons is reg; ons doen dit immers al vir jare so.

Maar dan wil ek vra: Vir al die jare wat u reg is, hoeveel keer het u die **krag** van die Here ervaar? Hoeveel keer het u die **werklike teenwoordigheid** van die Here ervaar? Hoeveel keer het **God neergedaal** om **Self Sy vure** in die gemeente **aan te steek**.

Hoeveel keer het u met die **vuur van God in kontak** gekom? Indien u dit nog **nie ondervind** het nie of indien u dit **weinig ondervind** het, dan is u besig om **verkeerde vuur** voor God te bring.

Dan bring u **vreemde vuur** voor God, vuur wat God **nie wil aanneem nie**. Indien ons **vuur reg** is, en ons **offers reg** is, sal God in **vuur neerdaal** om die **offers te verteer**.

Dit sal die **teken wees** dat God die **offers aanneem**, wanneer ons **Sy vuur ervaar**, want God is 'n **verterende vuur**.

**Jes. 29:6** “ Vanweë die HERE van die leërskare sal jy **in genade besoek word**, met **donder en aardbewing** en **groot gedruis, wind en storm** en die **vlam** van 'n **verterende vuur**.”

God **besoek** die mens in die **vlam van 'n veterede vuur**.

**Hand. 2:1** “En toe die dag van die pinksterfees aangebreek het, was hulle almal **eendragtig** bymekaar.

:2 En daar kom skielik uit die hemel 'n **geweldige rukwind**, en dit het die hele huis gevul waar hulle gesit het.

:3 Toe is deur hulle **tonge gesien soos van vuur**, wat hulleself verdeel en op **elkeen van hulle gaan sit**.

:4 En hulle is **almal vervul met die Heilige Gees** en het begin **spreek in ander tale**, soos die Gees aan hulle gegee het om uit te spreek.”

Dit is hoe die **dissipels God ervaar** het op die **dag van Pinkster**, en dit is hoe ons God vandag nog steeds ervaar.

Indien God nie **in vuur neerdaal** nie, het God nie ons **offers aangeneem** nie. Dan was ons **offers te swak** voor God, of dit was met die **verkeerde gesindheid** gebring.

Wie het die orde van ons dienste bepaal? Ons kan sê: “O”, dit was **baie jare Gelede bepaal**, nie deur 'n **spesifieke persoon** nie, ek glo dit is **hoe God dit self** ingestel het.

Indien **God dit self ingestel** het, hoekom het daar dan so baie van die **Roomse gebruike** in ons kerke behoue gebly? Hoekom moet ons dan doen waarvan die mense hou en wat vir die **mens aanvaarbaar** is?

Word alles nie **dalk maar gedoen** soos dit die **mens behaag** nie? Watter **rol speel tradisie** in ons dienste?

**Mark. 7:13** “So maak julle dan die **woord van God kragteloos** deur julle **oorlewering** wat julle **bewaar** het; en **dergelike dinge van dieselfde aard doen julle baie.**”

Ons leun op die vlees, **ons sondige harte sê vir ons wat om te doen**. Ons **sondige natuur** moet bepaal wat **reg** en wat **verkeerd** is, wat **goed** en wat **sleg** is, wat **gewens** en wat **ongewens** is, wat vir God **welgevallig** is en wat **nie vir God welgevallig is nie**.

So word **God se instellings** oor die jare met **menslike instellings vervang**.

Dit wat die **mens wil hê** word op die **vogrond gestel** en as **noodsaaklik** beskou.

Geliefdes, so ‘n **eiewillige Godsdienst** kan **God nie behaag nie**. Dit is **niks anders** as **vreemde vuur** voor God nie.

Daarom het Jesus die **eiewillige Godsdienst** van die **Fariseërs afgekeur** en **veroordeel**. Deur **hulle instellings** het hulle **God se gebod kragteloos** gemaak.

In menigte gevalle was dit **in totale teenstelling** met dit wat **Moses** hulle **geleer** het.

**Mark. 7:7** “Maar **tevergeefs** vereer hulle **My** deur **leringe te leer** wat **geboorte van mense** is.

:8 Want terwyl julle die **gebod van God nalaat**, hou julle aan die **oorlewering van mense vas**: die **wassery** van **kanne** en **bekers**, en ander dergelike dinge van dieselfde aard doen julle baie.

:9 En Hy sê vir hulle: Julle verstaan dit goed om die **gebod van God opsy te sit** en so julle **oorlewering te onderhou.**”

Op ‘n stadium in **enige mens** se lewe of **gemeente** se bestaan of **kerk** se bestaan, moet daar op die **knieë gegaan** word en gevra word: “**Wat is U wil Here?**”

Wat is die belangrikste, die **innerlike** of die **uiterlike**? Waar wil ons die **kanne** die **skoonste hê** – **binne** of **buite**?

Deur ons **eiewillige Godsdienst** ontheilig ons die **wil van die Here** en bring ons **Sy toorn oor ons**. Ons moet **versigtig wees** dat ons Godsdienst nie maar net ‘n **gewoonte word** nie. Ons moet seker maak dit is **God se vuur** wat in ons **harte brand**.

